

四庫全書

史部

欽定四庫全書

史部

欽定續通志卷

四百九十九
至五百四

編修臣謝振定覆勘

總校官原任侍講臣王燕緒

欽定四庫全書

欽定續通志卷四百九十九

列傳

元五十三

馬祖常

庫庫和和

策丹

阿榮

蘇爾約蘇哈雅

達爾瑪

伊魯特穆爾

琳沁巴勒

廉和斯喀雅

達爾瑪實哩

馬祖常字伯庸世為永古特部居靖州天山伊克努爾

之曾孫也父潤同知漳州路總管府事

按祖常自撰石田山房記載其

父字浚儀贈騎都尉開封郡伯嘗監光州

家於光州祖常七歲知學十歲時

見燭歌燒屋解衣沃水以滅火咸嗟異之既長益篤學

受業於蜀儒張頴講道儀真往受業其門頴甚器之延

祐初鄉貢會試皆中第一廷試為第二授應奉翰林文

字

按元明善送祖常南歸序作應奉翰林文字同知制誥兼國史院編脩官

拜監察御史時

仁宗在御已久猶居東宮飲酒常過度祖常抗疏陳諫
英宗為皇太子又上書請慎簡師傅又劾姦臣特們德
爾列其十罪仁宗震怒罷特們德爾相秦州山移祖常
言山不當動而動由野有當用不用之賢官有當言不
言之佞故致然爾疏聞大臣皆家居待罪祖常薦賢拔
滯知無不言俄改宣政院經歷月餘辭歸起為社稷署
令亡何姦臣復相左遷開平縣縣尹因欲中傷之遂退
居光州久之姦臣既死乃除翰林待制累遷禮部尚書

尋辭歸天歷元年召為燕王內尉仍入禮部兩知貢舉
一為讀卷官時稱得人遷江南行臺中丞元統元年召
議新政拜御史中丞持憲務存大體不事苛細除樞密
副使頃之辭職歸光州復除江南行臺中丞又遷陝西
皆以疾不赴至元四年卒贈魏郡公諡文貞祖常立朝
多所建明其為文章宏贍而精核尤精於詩有文集行
於世嘗預修英宗實錄又譯潤皇圖大訓承華事略又
編集列后金鑑千秋記畧以進受賜優渥文宗嘗數賞

為中原碩儒云

庫庫字子山喀喇氏博果密之子也幼隸業國學博通
羣書長襲宿衛始授承直郎集賢待制遷兵部郎中轉
祕書監丞奉命往覈泉舶芥視珠犀不少留目累官至
翰林學士承旨知制誥兼修國史知經筵事先是文宗
勵精圖治庫庫嘗以聖賢格言講誦帝側裨益良多順
帝即位之後翦除權姦思更治化庫庫侍經筵日勸帝
務學帝輒就之習授欲寵以師禮庫庫力辭不可凡四

書六經所載治道悉為紬繹必使感動帝衷帝暇日欲觀古名畫庫庫即取郭忠恕比干圖以進帝偶覽宋徽宗畫稱善庫庫言徽宗多能惟不能為君爾或遇天變民災必憂見於色乘間進言請帝側身修行以回天意帝察其真誠每虛已聽之大臣議罷先朝所置奎章閣學士院及藝文監諸屬官庫庫進曰民有千金之產猶設家塾延館客豈有堂堂天朝一學房不能容耶帝聞而深然之即改奎章閣為宣文閣藝文監為崇文監存

設如初就命庫庫董治時科舉既輟庫庫從容為帝言
帝采其論尋復舊制一日進讀司馬光資治通鑑因請
遼金宋三史後置局纂修實由庫庫發其端又請行鄉
飲酒於國學使民知遜悌及請褒贈唐劉蕡宋邵雍以
旌道德正直帝從其請庫庫以重望居高位而雅愛儒
士以故四方士大夫翕然宗之既而出拜江浙行省平
章政事明年復以翰林學士承旨召還時中書平章闕
員近臣欲有所薦以言覘帝意帝曰平章已有人今行

半途矣近臣知帝意在庫庫不復薦人至京七日感熱疾卒至正五年也家貧幾無以為斂帝震悼賜賻有加庫庫善真行草書單牘片紙人爭寶之

按報料錄云庫嘗問客云一

日可寫幾許字客曰間趙學士云一日可寫萬字庫庫曰余一日寫三萬字未嘗以力倦而輟筆此工書之一

証也附誌之

謚文忠兄和

和和字子淵敦默寡言嗜學能文在成宗朝宿衛擢太常院使武宗正位以藩邸舊臣出使稱旨至大間累遷河南廉訪使行省丞相行事多不法納琳為郎中每格

不下丞相怒欲出之和和察其賢抗章舉任風憲後歷
三臺為名臣英宗即位丞相拜珠首薦為戶部尚書尋
拜南臺侍御史改叅議中書以議定刑書如法帝嘉納
其奏泰定初奏減漕運糧數以紓東南民力遷江浙行
省右丞文宗立除宣政院使上言乞沙汰僧道擢中書
右丞力辭還第聞明宗崩流涕不能食自是杜門不出
者數年以疾卒與弟庫庫皆為時之名臣庫庫子維山
歷官崇文太監

策丹蒙古人英宗時由舒庫爾齊擢監察御史錄囚大興縣以冤獄上御史臺臺臣不聽改委他御史讞之竟處死後數日其冤始白人服其明泰定二年扈從至上都糾言參知政事楊庭玉賊罪不報即納印還京師帝遣使追之俾復任即再上章劾庭玉竟如其言又劾奏平章政事圖們岱爾預聞英宗被弑之謀不省轉賜圖們岱爾黃金繫腰策丹遂辭職改工部員外郎中書省委開混河策丹往視之以為難成役乃罷會三皇后殂

命工部撤行殿車帳皆新作之策丹入見帝奏曰皇后
行殿車帳尚新若改作之恐勞民費財必欲捨舊更新
則大明殿乃自世祖所御列聖嗣位豈皆改作乎帝悅
語省臣曰用人如策丹庶不悞大事遷吏部員外郎帝
欲加號太后曰太皇太后策丹謂於典禮不合議遂罷
遷中書客省使俄改同僉宣政院事文宗即位除中書
左司郎中有詔使自江浙還言行省臣意若有不服者
帝怒命遣使問不敬狀將悉誅之策丹言於丞相雅克

特穆爾曰皇帝新即位雲南四川猶未定乃以使臣一
言殺行省大臣恐非盛德事雅克特穆爾言於帝事乃
止既而升參議中書省事雅克特穆爾議封太保巴延
王爵衆論附之策丹獨持不可遂寢其議拜治書侍御
史初文宗在潛邸欲創天靈寺令有司起民夫江南行
臺監察御史伊奇爾台謂宜出錢募夫不當役民至是
文宗欲黜伊奇爾台策丹諫曰御史為陛下盡言乃忠
臣也今無罪而黜之非所以示天下乃除伊奇爾台僉

憲湖南文宗嘗欲游西湖策丹諫止之不聽遂稱疾不從文宗顧謂臺臣曰策丹終不滿朕此游耶臺臣嘗奏除目文宗塗一人姓名而綴將作院官拉里之名策丹言拉里為人詼諧惟可任教坊司若居風紀則臺綱掃地矣文宗乃止已而出為陝西行臺侍御史順帝初除福建轉運鹽使既而為浙西肅政廉訪使時有以內駙馬為江浙行省丞相者其宦豎恃勢不法策丹逮之械以令衆自是丞相府無敢為民害者尋召為同僉樞密

院事復為治書侍御史同知經筵事寧夏人有告瑪們等謀害太師巴延者巴延委策丹與中書樞密等官往寧夏鞠問無其情乃以誣罔坐告者罪巴延怒乃左遷策丹同知徽政院事策丹歷事四朝衍衍剛介終始一節有古遺直風然卒以是忤權貴不復柄用君子惜焉阿榮字存初奇味氏父阿勒坦中書右丞阿榮幼事武宗脩宿衛累遷為湖南道宣尉副使會列郡飢分廩祿以食餓者仍發粟賑之所活甚衆廣西寇起衆皆洵懼

阿榮鎮之以靜督有司治兵守其境寇不敢入遷湖廣
行省左右司郎中天歷二年積官至奎章閣大學士文
宗甚眷遇之阿榮自盡心國政知無不言久之忽鬱鬱
不樂謁告南歸武昌至元元年卒初阿榮閒居以文翰
自娛讀書慕古忠臣孝子之行尤深於數學推事多奇

中天歷三年

按文宗紀天歷三年實至順元年也改元在五月而廷試以三月故本傳及選舉志

並稱天歷三年

策士於廷阿榮與虞集會於直廬慨然興嘆語

集曰更一科後科舉當輟輟兩科而復復則人材彬彬

大出矣又嘆曰榮不復見之矣君猶及見之集問何以知之弗答後五年卒元統三年科舉果罷至正元年始

復

按順帝紀罷行科舉在至元元年即傳所云元統三年也至科舉之復則在至元六年本傳作至正元年

誤如其言

蘇爾約蘇阿雅阿爾哈雅之孫也父楚國忠惠公名袞格根蘇爾約蘇哈雅遂以袞為氏復以酸齋自號年十二三膂力絕人運槩生風觀者辟易或挽強射生上下峻阪如飛稍長折節讀書為文不蹈襲故常能出人意

表初襲父官為兩淮萬戶府達魯噶齊鎮永州御軍極
嚴行伍肅然暇輒投壺雅歌不為形迹所拘一日呼弟
呼圖克哈雅語曰吾宦情素薄顧祖父之爵不敢不襲
今願以讓弟即解所綰黃金虎符佩之比從姚燧學燧
見其古文峭厲有法及歌行古樂府慷慨激烈大奇之
仁宗在東宮聞以爵讓謂宮臣曰將相家子弟有如是
賢者耶俄遷為英宗潛邸說書秀才宿衛禁中仁宗踐
阼上疏條六事一曰釋邊戍以修文德二曰教太子以

正國本三曰設諫官以輔聖德四曰表姓氏以旌勲胄
五曰定服色以變風俗六曰舉賢才以恢至道書凡萬
餘言未報拜翰林侍讀學士知制誥同修國史會議科
舉事多所建明忽喟然嘆曰辭尊居卑昔賢所尚今禁
林清選與所讓軍資孰高人將議吾後矣乃稱疾辭還
江南賣藥於錢塘市中詭姓名易服色人無有識之者
偶過梁山灤見漁父織蘆花為被欲易之以紬漁父請
賦詩遂援筆立成竟持被去人間喧傳蘆花被詩其依

隱玩世多類此晚年為文日遽詩亦冲澹草隸等書稍
取古人所長變化自成一家士大夫得其片言尺牘如
獲拱壁泰定元年卒追封京兆郡公謚文靖有文集及
直解孝經一卷行於世子二人阿爾斯蘭哈雅布斯哈
雅

達爾瑪高昌人

薩奇蘇傳
作回鶻人

山東行省都督薩奇蘇之孫

也弱冠入宿衛大德十一年授御藥院達魯噶齊遷回
回藥物院尋出食湖北山南兩道廉訪司事召拜監察

御史時丞相特們德爾專權貪肆達爾瑪率同寅額琳沁馬祖常劾其罪高昌僧特丞相威違法娶婦達爾瑪詰問之風紀大振擢河東廉訪副使至治元年特們德爾復相以復讎為事達爾瑪辭去明年改燕南道廉訪副使三年

原文誤作至治元年今改正

除濟寧路總管興學勸農百

廢具修府無停事泰定元年升福建廉訪使朝廷遣宦官巴延催督綉段橫取民財宣政院判官卓琳亦取賂於富僧達爾瑪皆劾之遷浙西廉訪使會文宗發江陵

阿爾噶圖來諭旨求賂不獲還譖於朝召至京將處以

重罪比至帝怒解遷上都同知留守天歷二年

原文誤作天歷

元年今據文宗紀改正

明宗崩文宗復正大統使者旁午達爾瑪

朝暮盡力事無缺失天歷三年

文宗紀作至順元年

遷淮東廉訪

使明年召拜刑部尚書元統元年升遼陽行省叅知政

事高麗國使朝京道過遼陽謁省官各奉布四匹書一

幅用征東省印封之達爾瑪詰其使曰國制設印以署

公牘何為封私書況汝出國時我尚未為遼陽省官何

故有書遺我使辭屈即還其書與布三年遷山東廉訪使時山東盜起乘馬騾及新李白晝殺掠達爾瑪以為官吏貪污所致先劾去之而後上擒賊方略朝廷嘉納之即遣兵擒獲齊魯以安除大都留守帝嘗命脩七星堂達爾瑪務為樸素左右皆不然及車駕自上京還入觀之大喜歎曰有心哉留守也至正六年升河南行省右丞改翰林學士承旨七年遷陝西行臺中丞致仕全俸優養終身

伊嚕特穆爾布朗吉爾都爾伯特氏曾祖古裕事太祖
為管領齊哩克昆集賽官祖哈喇襲父職事世祖父布
呼齊由宿衛為中書右司員外郎與丞相哈喇哈斯建
議迎立武宗累遷至山北遼東道肅政廉訪使伊嚕特
穆爾倣儻有大志年十二成宗命與哈喇哈斯之子托
歡同入國學仁宗時入宿衛帝問知為布呼齊子因傳
旨令常侍禁廷毋止其入久之拜監察御史巡按上都
劾奏太師右丞相特們德爾受張弼賕貸死帝怒碎太

師印除伊嚕特穆爾兵部郎中累遷右司郎中賜坐便殿帝顧左右曰伊嚕特穆爾識量明遠可大用者也他日帝語近臣曰朕聞前代皆有太上皇之號今皇太子且長可居大位朕欲與若等游觀西山以終天年御史中丞曼濟等皆稱善伊嚕特穆爾獨起拜曰臣聞昔之所謂太上皇若唐玄宗宋徽宗皆當禍亂不得已而為之者也願陛下保萬世無疆之業勿慕前代虛名帝善其對仁宗崩特們德爾復入相叅議青沙津以受人金

帶繫獄特們德爾乃使青沙津懇伊嚕特穆爾為御史
時誣丞相受賕皇太后命丞相哈克繖推問不實事遂
釋特們德爾乃奏以為山東鹽運司副使期月間鹽課
增以萬計丁外艱扶喪西還擢山南江北道肅政廉訪
副使泰定初遷汴梁路總管致和元年河南行省平章
巴延矯制起為本省叅知政事共議起兵伊嚕特穆爾
辭曰皇子北還問叅政受命何人則將何辭以對巴延
怒會明埒克棟阿迓皇子過河南而伊嚕特穆爾為御

史時嘗劾其娶娼女冒受封明埒克棟阿因說巴延收之丞相拜布哈亦與之有隙乃謫伊魯特穆爾乾寧安撫司安置至順四年移置雷州至元六年順帝召之還至正二年入覲帝欲留之以母喪未葬辭四年乃起同知將作院事尋除大宗正府伊克扎爾古齊九年拜翰林學士承旨知經筵事進讀之際引援經史一本於王道帝嘉納焉十二年江南盜賊充斥詔拜伊魯特穆爾平章政事行省江浙比至鎮詢守備之方招募民兵數

千號令明肅統師至建德獲首賊何福斬於市遂復淳安等縣俘獲萬餘人是年次徽州以疾卒於軍中

琳沁巴勒西夏人知樞密院事安巴子也性剛直動有禮法仁宗召見令入宿衛延祐六年起拜翰林侍講學士至治二年調同知通政院事五遷為侍御史兼唐古親軍都指揮使至順初拜翰林學士承旨遷功德使尋復為翰林學士承旨元統至元之間丞相巴延專權擅政嫉其論事不阿出為江南行臺御史大夫尋殺其子

達爾瑪而謫置海南巴延敗乃召還朝至正六年拜御史大夫盡選中外廉能之官置諸風憲一時號稱得人遷宣政院使出為甘肅行省平章政事設法弭西羌之寇民賴以安召還知樞密院事尋復為御史大夫總經筵事兼宣忠烏魯斯扈衛親軍指揮使嘗奏言風俗人心日趨於薄請禁故吏不許彈劾所事官長太師滿濟勒噶台與子丞相托克托既謫居在外時相欲傾之嗾人告變且扳臺臣同上奏額琳沁巴勒不從凡遇經筵

進講必詳必慎帝每嘉納監察御史劾時相帝不聽額琳沁巴勒反覆論奏不已由是忤帝意出為江浙行省平章政事遷拜湖廣行省左丞相復召知樞密院事十一年潁亳盜起官兵多失律致敗數進言於時相不見聽復出為江浙行省左丞相十二年移江西時妖寇由蘄黃陷饒州饒之屬邑安仁民皆相挺為亂琳沁巴勒因駐兵招之來者厚加賞賚不從者縱火攻散之餘干久為盜區至是亦聞風順服初江西行省平章政事道

通以寬容為政軍民懈弛琳沁巴勒既至風采一新威聲大振所在羣盜咸謀歸款十四年卒於官所部為之喪氣追封齊王謚忠獻子九人

廉和斯哈雅字公亮博囉哈雅之孫希憲從子也父阿哩衮哈雅廣德路達嚕噶齊和斯哈雅幼孤言及父輒泣下貧居養母垢衣糲食不以為恥母喪哀毀踰禮負喪渡江而風濤作舟人以神龍忌屍為言即仰天大呼曰吾將附母於先塋神奈何阨我也風遂止年弱冠大

臣欲俾入宿衛辭曰吾從父

原文作大父今改正

事世祖以通經

號廉孟子今方設科取士願讀書以科第進乃入國學

至治元年登進士第授同知順州事有弓匠提舉滿達

勒者怙勢奪州民田同列畏之和斯哈雅至即窮治之

在官期年召入史館預修英宗顯宗實錄

原文作預修英宗仁宗實

錄前後倒置考本紀延祐七年纂修仁宗實錄其時和斯哈雅未登第也又考泰定元年命修英宗顯宗實錄

和斯哈雅入史館應在此時謹改正

尋拜監察御史時中書省有大臣貪

猥狼籍即抗章劾之既又劾奏明埒棟阿不當攝祭太

廟遷都水監疏會通河隄灤漆二水又修京東閘厯秘書丞會福總管府治中上疏言二月迎佛費財蠹俗時論肆之出僉淮東廉訪司事逸升江南行省御史臺經歷時山東鹽法大壞以選除都轉運使未期月輒課最至正三年初行郊禮召拜侍儀使明年預修遼金宋三史遷崇文太監自是累遷為河南行省右丞時詔發民治決河徧騷屬郡亟以不便上言而時宰不用遷湖廣行省右丞以武昌失守連坐既而事白遷江西行省右

承時所隸郡縣多陷於賊乃與平章政事司徒道通協謀殫力定守禦招捕之策就除本道廉訪使未幾江西省治亦陷遁往福建久之除遷江浙行樞密院事改拜福建行省右丞以兵鎮延平邵武境內以寧居歲餘奉詔還治省事總備禦事且督賦稅由海道供京師朝廷賴焉遷行宣政院使明年拜翰林學士承旨知制誥兼修國史卒

達爾瑪實哩字導道齊哩克台氏其先北方大族六世

祖始居開平父曰阿拉克布哈江西行省參知政事追封趙國公諡襄惠達爾瑪實哩幼穎敏從師授經史過目輒領解至正五年經筵選充譯史累官至刑部尚書提調南北兵馬司巡綽事盜逼畿甸人心大恐達爾瑪實哩鎮之以靜民恃以安二十一年由中書參議升中書參知政事同知經筵事二十三年遷上都留守兼開平府尹分司土嶺東鎮三州以督轉輸二十四年朝廷以前中書平章政事達實特穆爾來為留守時博囉特

穆爾擁兵京師皇太子出居於外達爾瑪實哩與達實
特穆爾皆以忠義許國相與結人心以觀時變未幾改
授達實特穆爾為大司農達實特穆爾謂達爾瑪實哩
曰若至京師則制於強臣未易圖也因留不行適塔奇
勒以博囉特穆爾命屯兵哈里泊而以留守善安集兵
於鄂濟哩部落達爾瑪實哩遇之有禮善安辭去博囉
特穆爾復調特穆爾托噶蘇克至上都以守禦為名事
益矛盾達爾瑪實哩與之周旋略無幾微見於外而密

遣使通音問於汗哈勒哈行樞密知院伊埒岱爾請亟
調兵南行又遣留守司照磨陳恭取兵興州訪求在閑
官吏之有才者約束東西手巴爾噶齊虎賁司糾集丁
壯苗軍火銃什伍相聯一旦布列鐵旂竿山下揚言四
方勤王之師皆至特穆爾等駭走所將兵盡潰由是達
爾瑪實哩增修武備城守益嚴二十五年皇太子在冀
寧命立上都分省達實特穆爾為平章政事達爾瑪實
哩為右丞便宜行事圖沁特穆爾用博囉特穆爾命以

兵犯上都先遣利用少監特爾格齊至上都令備糧餼
遠近大軍達爾瑪實哩開陳大義戮之於市民情乃定
已而圖沁特穆爾率馬步軍蔽野而至呼聲動天達爾
瑪實哩飭軍士守城申明逆順之理以安人心巡視城
壁晝夜不少息夜遣死士縋城而下焚其攻具調副留
守圖魯默色哈雅引兵出戰敗之未幾博羅特穆爾伏
誅圖沁特穆爾奔潰上都以安拜中書右丞兼上都留
守提調虎賁司仍命提調東西手巴爾噶齊明年召為

大宗正府伊克扎爾古齊又明年拜太子詹事奉詔至軍中宣明大義藩將感悅遷翰林學士承旨除知樞密院事兼大撫軍院事初大撫軍院之立皇太子專以備禦庫庫特穆爾既而政權不一事務益垂迨達爾瑪實哩至事已無可為者達爾瑪實哩之卒也先一夕集賽官哈喇章夢太祖召見語之曰我以勤勞取天下以傳於托歡特穆爾而阿裕實哩達喇不克肖似廢壞我家法苟不即改圖天命不可保矣汝明旦亟以吾言告而

主及阿裕實哩達喇汝不以告吾即殛汝告而不改則
吾有以處之達爾瑪實哩其人庶幾識事然知而不言
將焉用之吾其先殛之矣明旦哈喇章入見帝具以夢
告帝令以告皇太子比出則達爾瑪實哩已無疾而卒
矣

欽定續道志卷四百九十九